

東

華

錄

東華錄

康熙八十九

臣王先謙敬編

臣周瀚蕃恭校

康熙五十一年壬辰春正月丙午刑部等衙門奏察審戴名世所著南山集子遺錄內有大逆等語應卽行凌遲已故方孝標所著滇黔紀聞內亦有大逆等語應剉其屍骸戴名世方孝標之祖父子孫兄弟及伯叔父兄弟之子年十六歲以上者俱查出解部卽行立斬其母女妻妾姊妹子之妻妾十五歲以下子孫伯叔父兄弟之子亦俱查出給功臣家爲奴方孝標歸順吳逆身受僞官迫其投誠又蒙恩免罪仍不改恃逆之心書大逆之言令該撫將方孝標同族人不論服之已盡未盡逐一嚴查有職銜者盡皆革退除已嫁女外子女一併卽解到部發與烏喇甯古塔白都納等處

安插汪灝方苞爲戴名世悖逆書作序俱應立斬方正玉尤雲鸞
聞拏自首應將伊等妻子一併發甯古塔安插編修劉巖雖不曾
作序然不將書出首亦應革職僉妻流三千里 上曰此事著問
九卿具奏案內方姓人俱係惡亂之輩方光琛投順吳三桂曾爲
僞相方孝標亦曾爲吳三桂大吏伊等族人不可畱本處也○諭
大學士等原任大學士張玉書久任機務小心恪慎懋著勤勞朕
追念難忘伊惟一子張逸少見任編修著從優升爲翰林院侍讀
學士以示朕篤眷舊臣至意○戊申以李世仁爲貴州按察使由
西左江道遷○王子諭大學士等今天下承平日久人多重文輕武殊
不知天下雖太平武備斷不可廢朕補授武官必簡用曾經效力
及弓馬嫻熟者以此人皆互相激勸學習弓馬黽勉效力如滿洲
身歷行間隨圍行獵素習勤苦故能服勞若漢人則不能矣雖由

風土不同亦由平日好自安逸之所致也○諭領侍衛內大臣大學士都統尚書副都統侍郎學士副都御史等自古帝王統馭天下君臣一心無有異意故凡事無不就理儻上下睽隔各懷一心則凡事無不滋弊此理所必然也朕今春秋已高聽政年久眾亦謂朕事事經歷無不周知但不聞不見之事甚多雖有言官類多瞻顧緘默是以託合齊等輩小人常昂然張膽搆集黨羽今已顯露亂臣賊子歷代有之但爲君者見於幾先則不露聲色自然滅除若漸使滋蔓其弊不可勝言矣朕爲國爲民宵旰勤勞亦屬分內常事此外所不得聞者常令各該將軍總督巡撫提督總兵官因請安摺內附陳密奏故各省之事不能欺隱此於國計民生大有裨益也爾等皆朕所信任位至大臣當如諸省將軍督撫提鎮一體於請安摺內將應奏之事各罄所見開列陳奏所言若是朕

則擇而用之所言若非則朕心既明亦可手書訓諭而爾等存心之善惡誠僞亦昭然可見矣朕於諸事謹慎舉朝無不知之凡有密奏無或洩漏但大膽不肖瞽不畏死之徒從中拆視或原奏之人朋友眾多口不密而洩漏者亦有之至一概奏摺不遲時刻皆不畱稿朕親自手批發還凡奏事者皆有朕手書證據在彼處不在朕所也爾等果能凡事據實密陳則大貪大奸之輩不知誰人所奏自知畏懼或有宵小誑主竊竇恩威者亦自此顧忌收斂矣爲此特諭○癸丑 上巡幸畿甸啟鑒○諭大學士等右衛將軍宗室費揚固爲人正直奏事朕前言語誠實凡伊所見所聞之事卽行直奏並無欺隱且盡職年久聲名亦佳今已年邁又係王之子可授爲公著宗人府議奏尋議費揚固應授爲輔國公從之二月丁巳諭大學士等朕自冲齡篤好讀書諸書無不覽誦每見

歷代文士著述卽一句一字於理義稍有未安者輒爲後人指摘
惟宋儒朱子註釋羣經闡發道理凡所著作及編纂之書皆明白
精確歸於大中至正經今五百餘年學者無敢疵議朕以爲孔孟
之後有裨斯文者朱子之功最爲宏鉅應作何崇禮表彰爾等會
同九卿詹事科道詳議具奏尋議宋儒朱子配享孔廟本在東廡
先賢之列今應遵旨升於大成殿十哲之次以昭表彰至意從之
○江蘇巡撫張伯行奏參江南江西總督噶禮得銀五十萬兩徇
私賄賣舉人程光奎吳泌等不肯審明請將噶禮解任嚴審得旨
噶禮著解任此事著張鵬翮會同總漕赫壽確審具奏江南江西
總督印務著江西巡撫卽廷極署理噶禮奏參張伯行誣臣私賣
舉人得銀五十萬兩乞賜對質得旨張伯行著解任此事著張鵬
翮會同總漕赫壽確審具奏江蘇巡撫印務著浙江巡撫王度昭

署理○諭九卿等噶禮張伯行互參一案噶禮有辦事之才用心緝拏賊盜然其操守則不可保張伯行爲人老成操守廉潔然盜劫伊衙門附近人家尙不能查拏噶禮曾參原任知府陳鵬年陳鵬年居官雖善乃一膽大强悍之人噶禮張伯行互相不睦者皆陳鵬年愆愆所致據張伯行參奏云噶禮得銀五十萬兩未必全實亦未必全虛卽噶禮所參張伯行之事亦必有兩三款是實至海賊一案命江南浙江福建三省督撫前往乃皆畏懼推諉惟噶禮至盡山花鳥緝拏賊盜因此各省督撫甚怨噶禮此案察審實難若命滿大臣審則以爲徇庇滿洲若命漢大臣審則以爲徇庇漢人至張伯行奏參疏內連及張鵬翮者意欲審理此事時使張鵬翮回避故朕仍令張鵬翮從公審理○吏部等衙門議准福建浙江總督范時崇奏沿海捕魚船隻止許用雙桅不准越省行走

交與該州縣查明令沿海提鎮副協等營鈐束 上曰觀范時崇
條奏之事於地方民生無益福建大洋內無賊盜內地沿海一帶
俱係小賊文武各官果實心盡力撫綏緝獲自然無事今若照所
奏將捕魚船戶併入水師營分轄則啟武弁兵丁侵剋之弊矣且
賊盜竊發何地無之若欲將賊盜盡除亦斷不能凡事止應視有
益於民者行之不當迫之以法此條奏不可行將原本發還○大
學士等以吏部奏補各省學政請旨 上曰提督學政有教育士
子選取人才之責關繫甚要從前學差聲名不善者多善者少或
有取二三學問優者因而得名或有取二三寒士因而得名俱不
可謂之善今大臣官員子弟內不無學問優者但提督學政之人
伊身鄉會試時或僥倖而得故提督學政之日取士亦多未公科
道官員知其情弊徇情不行指參此任甚要開列人員內有爾等

所知者各從公舉出又諭曰川陝總督殷秦居官善不但操守好而人材亦優但知爲公效力毫不徇部院中人情面乃實心辦事之人浙江提督吳郡居官亦善福建武官內無有及之者福建提督楊琳人明白雲南提督張谷貞江南提督師懿德延綏總兵官李耀甯夏總兵官范時捷居官俱善福建提督藍理居官甚劣但其屬下額兵缺伍不補者較之愈益謨尙少耳直隸守道祁國祚前此居官尙善今改易其操爲人亦屬奔競鎖營巡撫趙宏燮至今仍隱忍不參又原任巡撫汪灝任山西學政時聲名甚佳後任河南巡撫時卽改易其操聲名埽地矣○庚申轉覺羅法喇爲刑部左侍郎以薩爾臺爲刑部右侍郎由內閣學士遷○壬戌以李苾爲河南布政使由雲南按察使遷○丙寅以阿爾筏爲內閣學士由太僕寺卿遷○戊寅命卓異武職照文職例引見○庚辰上還京師○壬午諭大

學士元卿等朕覽各省督撫奏編審人丁數目並未將加增之數盡行開報今海宇承平已久戶口日繁若按見在人丁加徵錢糧實有不可人丁雖增地畝並未加廣應令直省督撫將見今錢糧冊內有名丁數勿增勿減永爲定額其自後所生人丁不必徵收錢糧編審時止將增出實數察明另造清冊奏報朕凡巡幸地方所至詢問一戶或有五六丁止一人交納錢糧或有九丁十丁亦止二三人交納錢糧詰以餘丁何事咸云蒙皇上宏恩並無差徭共享安樂優游閒居而已此朕之訪聞甚晰者前雲南貴州廣西四川等省遭叛逆之變地方殘壞田畝拋荒不堪見聞自平定以來人民漸增開墾無遺或沙石堆積難於耕種者亦間有之而山谷崎嶇之地已無棄土盡皆耕種矣由此觀之民之生齒實繁朕故欲知人丁之實數不在加徵錢糧也今國帑充裕屢歲蠲免輒

至千萬而國用所需並無貽誤不足之虞故將直隸各省見今徵收錢糧冊內有名人丁永爲定數嗣後所生人丁免其加增錢糧但將實數另造清冊具報豈特有益於民亦一盛事也直隸各省督撫及有司官編審人丁時不將所生實數開明具報者特恐加徵錢糧是以隱匿不據實奏聞豈知朕並不爲加賦止欲知其實數耳嗣後督撫等儻不奏明實數朕於就近直隸地方遣人逐戶挨查卽可得實此時伊等亦復何詞耶此事毋庸速議俟典試諸臣出闕後爾等會同詳加確議具奏

三月辛卯諭大學士等前諭事積十日彙奏一次者朕意原指部院衙門已結案件今各部將督撫等所奏事件亦入在彙奏案內啟奏此斷不可嗣後督撫等所奏事件另爲一本具奏著傳諭各部又翻譯本章關繫甚大昨見本內有假官二字翻作僞官舛錯

殊甚昔 太宗皇帝時朝鮮國進表原無不恭之語翻譯官意欲

啟釁故將表文翻錯以致問罪往征後纂修 實錄見彼表內漢

文與所翻滿文大不相同始知當時翻譯有弊且僞官與假冒不

同何得錯誤此皆翻譯各官不熟習滿文所致嗣後其愼之○丁

酉 上御經筵○戊戌諭大學士等中式進士內或有不能作文

令人頂替者亦未可定著於二十日齊備試卷令赴暢春園朕親

加覆試○庚子諭大學士等趙申喬奏請雲南貴州廣西三省中

額量增數名今覆試中式進士可令趙申喬將所取三省備卷舉

人亦帶來考邇來浙江江南人冒直隸等省北籍及代人考試者

甚多十三省語音朕悉通曉觀人察言即可識辨著出示徧曉中

式進士等其中有冒籍替代等項俱赴部首實覆試之日朕前亦

許面奏儻隱蔽不發朕一查出悔之不及○癸卯禮部等衙門議

覆左都御史趙申喬請增雲南貴州廣西進士額數一疏 上曰

朕先因此三省路遠人少每至脫科念邊陲窮士跋涉山川曾諭該部酌量增額以示勸勵故今三省文風日盛士子俱各黽勉肄業考試者漸多但取中額數尙少宜更加增爾等會議具奏再此番覆試不到者作何區處亦著議奏試卷內有不通者若革去進士不另行補取則進士數缺矣於某省革去者卽將某省未中卷內擇其佳者取補○乙巳諭大學士等今歲考取進士額數無多止一百六十一人揀拔庶吉士者不過四五十人其餘俱俟選授知縣縣令與民切近有刑名錢穀之責未登仕以前如不知事宜典禮則登仕之後於地方民生事務無裨益今歲考中進士除揀選庶吉士外其餘勿使回籍俱交與禮部選翰林內學優品端者數人派令教習文藝從事典禮如有修書處率同修書又考中

武進士皆以參將遊擊守備等項員缺補用此等俱有約束兵丁整飭營伍之責未補官以前不可不先令其學習嗣後考取武進士亦著勿回原籍見在年滿千總皆分撥八旗武進士等亦著分撥八旗隨圍學習行走○戊申大學士九卿等遵旨會議雲南貴州廣西三省應各增進士一名卽將趙申喬所薦三卷作新增之數又覆試不到中式舉人二十六名行文各該撫速行咨送到日請旨覆試又今科取中進士內文字不堪者已革退所缺額數伏乞 皇上將各省考試不中落卷內選擇取中從之○諭大學士等傳諭主考官趙申喬徐元夢於落卷中有可中者著選百卷呈覽又各館修書舉人落卷亦著查出一併呈覽殿試爲期甚迫覆試卷不及再分等第俱准其殿試其不通五卷革去進士仍留舉人下科會試○壬子賜舉人王圖炳等十七人一體殿試

夏四月丁巳賜王世琛等一百七十七人進士及第出身有差○

戊午轉薩爾臺爲刑部左侍郎調博音岱爲刑部右侍郎以二郎

保爲理藩院右侍郎

由內閣學士遷

○壬戌刑部等衙門議覆戴名世等

一案

上諭大學士等案內擬絞之汪灝在內廷纂修年久已經

革職著從寬免死但令家口入旗方登嶧之父曾爲吳逆僞學士

吳三桂之叛係伊從中慫恿僞朱三太子一案亦有其名今又犯

法妄行方氏族人若仍畱在本處則爲亂階矣將伊等或入八旗

或卽正法始爲允當此事所關甚大本交內閣收貯另行啟奏○

癸亥以馬進泰爲內閣學士

由太僕寺卿遷

○予故近御一等侍衛授副

都統品級海青祭葬諡果毅○甲子九卿等議戶部書辦沈天生

等串通本部員外郎伊爾賽等包攬湖灘河朔事例額外多索銀

兩沈天生伊爾賽應擬絞監候秋後處決並此案受賄之原任刑

部尚書齊世武原任步軍統領託合齊等應分別處分 上諭大

學士等閱此本齊世武託合齊口供並未取入齊世武品行齷齪

無恥前曾奏云不與人往來不取一文今於湖灘河朔事例一案

受賄矣託合齊行事悖亂又在鄂繕家行走不時請人會飲其中

亦有懼彼而往者亦有結成黨羽以威嚇人者今伊等見拘禁宗

人府著王雅爾江阿貝子蘇努公景熙大學士溫達蕭永藻會同

刑部詳審事已發覺實供則已若或巧辯爾等卽行刑訊○乙丑

宗人府等衙門遵旨將託合齊等結黨會飲一案審訊各供具奏

得旨此等事俱因允祔所致允祔行事天下之人無分貴賤莫不

盡知若果以孝爲本以仁爲行天下之人皆知係朕之子必無異

心何必求此等人保奏惟其行事不仁不孝難於掩蓋徒以言語

貨財買屬此等貪濁諂媚之人潛通信息尤屬無恥之甚託合齊

最爲下賤恣意貪婪事迹彰著鄂繕無知穉子巧語誘人止圖哺餒不惜顏面齊世武自幼與光棍結黨好爲爭鬪行事粗鄙昏濁殊非人類耿額居心暗昧臨事苛刻從前寶鼎修保索額圖長泰等皆知之迂圖係高麗之賤俘爲安親王屬下辛者庫因王厚待之朕不次擢用授爲都統與上三旗大臣一體加恩賞賚不意王喪事未畢卽與人會飲藐視小王子妄自尊大負恩背義如此都圖阜保武拜張伯良俱係辛者庫貧窮下賤並非守分安靜之人朝奇素多惡謀腎不畏死刁險叵測允祔亦所深知曾欲致之死地者此輩之黨早應族誅以昭國法但朕自御極以來好生爲德諸事詳慎將此輩從寬養翼其改悔乃猶有此等之事朕亦愧焉將此諭旨當眾犯宣讀令伊等竦聽託合齊耿額齊世武朝奇等見在別案審擬卽於各案完結鄂繕著革職拘禁迂圖仍入安

親王屬下辛者庫著看守王墓都圖等係辛者庫人著交與內務府總管請旨此外若犯別故卽於所犯案內定擬其一應發審取供之人不可畱於原任俱著革退○丁卯禮部等衙門奏嗣後會試不必豫定額數亦不必編南北字號並分官字號名色請按省編號印於卷面以便分別取中其滿洲蒙古漢軍卷面亦如各省例另編字號俱令知貢舉合算進場舉人實數臨期具奏恭請

皇上酌量省分大小人數多寡定額取中從之○王申諭吏部原任大學士熊賜履夙學老臣歷任多年朕初立講官熊賜履早夜惟謹未嘗不以內聖外王之道正心修身之本直言講論務得至理而後已况品行清正學問優長身歿以後朕屢加賜卹至今猶軫於懷原任大學士張英張玉書朕因眷念舊勞伊等之子俱已擢用優升熊賜履之子雖未中式但伊止有一子長成應照張英

張玉書之子一例推恩著調取來京酌量錄用以示朕不忘耆舊至意○大學士等遵旨覆奏臣等再訊沈天生伊爾賽一案原任刑部尙書齊世武受賄三千兩原任步軍統領託合齊受賄二千四百兩原任兵部尙書耿額受賄一千兩俱取供得實應照律擬絞監候秋後處決戶部侍郎李仲極不能查拏本部包攬情弊反縱容家人受賄又爲伊子從中捐納應降五級調用戶部尙書穆和倫侍郎塔進泰不能查拏本部包攬情弊反縱容家人受賄俱應降三級調用戶部侍郎噶敏圖雖不知情而本部包攬情弊失於覺察應降一級調用得旨齊世武託合齊耿額依擬應絞著監候秋後處決李仲極著革職穆和倫塔進泰著降三級從寬免調用噶敏圖著降一級從寬免調用○致仕文淵閣大學士陳廷敬卒命皇三子允祉及大臣侍衛等往奠茶酒各部院滿漢大臣往

弔 御製輓詩一首遣乾清門一等侍衛伍格南書房翰林勵廷

儀張廷玉齋賜給治喪銀一千兩尋予祭葬加祭一次諡文貞○

乙亥禮部奏直隸各省舉人貢監生員李長庚等呈稱康熙五十

二年恭遇 皇上六旬萬壽普天胥慶率土同歡恭請特開 萬

壽鄉會科以彰千載一時之盛應如所請照順治丙戌科特行鄉

試己亥科特行會試例於二月內舉行鄉試八月內舉行會試以

愜輿情以彰盛典得旨造就人材實爲美事著如所議行○以嵩

祝爲文華殿大學士兼禮部尙書調黑碩咨爲禮部尙書以滿篤

爲工部尙書由左都御史遷○以王掾爲文淵閣大學士兼禮部尙書調

陳詵爲禮部尙書以張廷樞爲工部尙書革職刑部尙書○丙子 上奉

皇太后避暑塞外啟鑒○調吳一蜚爲吏部尙書以胡會恩爲

刑部尙書由吏部左侍郎遷○以王原祁爲戶部右侍郎由掌院學士遷○以廖

騰燧爲戶部右侍郎田從典爲左副都御史

由光祿寺卿遷

○轉艾芳曾

爲刑部左侍郎以張志棟爲刑部右侍郎

由大理寺卿遷

○己卯以湯右

曾爲翰林院掌院學士兼禮部侍郎

由通政使遷

○壬午

上駐蹕熱

河

五月戊子刑部奏原任江蘇布政使宜思恭叩關控告總督噶禮

等需索銀兩以致虧空應差部院滿漢堂官往江南審理得旨此

案著張鵬翮審明具奏○己丑轉李旭升爲吏部左侍郎調王頊

齡爲吏部右侍郎以王思軾爲禮部左侍郎

由內閣學士遷

○以王企靖

爲左副都御史

由宗人府府丞遷

○癸巳諭刑部爾部事件甚屬緊要齊

世武膽大狂妄法喇無識無恥將事務堆積遲延不能整理自補

授哈山以來參革劣員剔除積弊辦理之事明而不煩一應案件

漸次完結可謂效力但恐意在速完或致草率刑名關繫重大務

須加意詳慎以副朕委任至意○丙申諭大學士溫達曰朕年六旬凡朝政尙能記之看過之書今則不能記矣溫達奏曰臣伏見皇上記性較前更勝每發出折本臣等恐其遺忘再三翻閱及至御前不盡記憶皇上一覽卽洞悉始末處置得宜皇上

聰明天縱實迥出尋常萬萬也○丁酉以王之樞爲內閣學士

任原

○庚子以王用霖爲廣東布政使

由廣西按察使遷

○壬寅諭大學士等

山東民人往來口外墾地者多至十萬餘伊等皆朕黎庶旣到口外種田生理若不容畱令伊等何往但不互相對閱查明將來俱爲蒙古矣嗣後山東人民有到口外種田者該撫查明年貌姓名籍貫造冊移送稽察由口外回山東去者亦查明造冊移送該撫對閱稽察則百姓不得任意往返而事亦得清釐矣○戊申諭吏部嗣後布政使按察使缺出將應升官員通行開列候朕選擇補

授○刑部奏四川陝西總督殷泰奏參縱容游民連直等不行查拏地方文武官員應分別議處 上諭大學士等連直等俱以行醫小業爲生各處餬口地方官員著從寬免其查參朕前諭各省督撫查拏越省游行者另有深意蓋謂奸惡之徒有爲僧道而行者亦有市藥賣卦而行者若不防微杜漸嚴行禁止令其任意行走結成黨類漸致人多勢盛卽行劫掠或致難圖凡多費錢糧索養兵丁者特欲翦除惡亂之輩耳明代李自成卽真驗也不豫爲之計可乎○以穆丹爲左都御史

察使

原任

由廣東按

六月癸丑朔日有食之○丁巳湖廣總督鄂海奏鎮寧邊外紅苗素稱强悍臣於康熙五十年九月會同撫提二臣親入苗寨宣布皇上威德令悔過革心今紅苗頭目吳老化等率毛都塘等處

五十二寨三千餘人實心投順得旨紅苗盤踞深山秉性兇惡自古以來並未歸順今總督鄂海等身入苗寨設法招撫殊爲可嘉該部將在事官兵一併議敘○差往江南審事尙書張鵬翮等回奏查審噶禮張伯行互參一案應將張伯行革職擬徒准贖噶禮降一級畱任 上諭大學士等張伯行參噶禮索銀五十萬兩審屬情虛江南一省舉人能有幾何縱盡行賄買亦不能至此數噶禮若受贓卽五萬亦當置之重典噶禮原非清廉之官但在地方亦有效力之處張鵬翮等審噶禮參張伯行並未審出一款張伯行原參噶禮內有干係國家之語亦未訊明審出似爲兩邊掩飾和解瞻徇定議大臣互相參劾豈可不徹底審明乃兩面調停草率完結况督撫等凡遇事故初參之時率張大其事以極重之詞參奏及至審時務必開脫消釋者甚多此亦陋習斷不可行此案

發回著大學士九卿等詳看會議具奏張鵬翮等又奏查察正考官左必蕃奏參吳泌等賄買舉人一案將吳泌等擬絞監候秋後處決副考官趙晉同考官王曰俞方名俱革職僉妻發煙瘴地方充軍正考官左必蕃所參雖實而取中舉人革退四名應將左必蕃革職上諭大學士等考試舉人進士所以爲國家遴選人才關係甚大世祖章皇帝諭旨炳明卽朕爲此事屢有諭旨亦甚嚴切從前科場有此弊發俱議軍法從事今趙晉干犯國憲於考試時私受賄賂暗通關節張鵬翮等並未將伊拏問嚴審且趙晉行止不端舉國無不知者左必蕃昏愚已甚被趙晉欺弄今但照革去舉人三四名之例僅以革職軍流草率完結可乎此案亦發回著大學士九卿等詳看會議繕摺具奏○戊午以武國楹爲福建布政使

由浙江按察使遷

武廷适爲廣東按察使

由山東齊東道遷

○甲子以

張文燦爲浙江按察使

由湖廣糧道遷

○庚午大學士等遵旨議覆噶禮

張伯行左必蕃趙晉等一案應交張鵬翮再審具奏得旨此案不可仍交與張鵬翮等審理著戶部尙書穆和倫工部尙書張廷樞前去再行嚴加審明具奏穆和倫等不必來請訓旨卽帶滿洲司官速行

東華錄

康熙九十

臣王先謙敬編

臣周倫蕃恭校

秋七月壬辰諭吏部七八九月掣籤官員若俟朕回鑾引見缺必
久懸著卽行啟奏○丁酉戶部奏原任西安驍騎校正藍旗巴布
叩聞言伊兄薩爾布善曾撫養和碩安親王之子塞冷額田產家
人等俱爲塞冷額占據入在包衣佐領下審問皆虛應將巴布枷
責以年老折贖 上諭大學士等此事所議不明 世祖皇帝時
將裕親王恭親王付與殷實官員撫養及至分封宗人府議將撫
養官員產業給與二王朕未允行大阿哥曾付與內務府總管噶
祿三阿哥曾付與內大臣綽爾濟撫養分封時亦議將伊等產業
給與朕俱不准行蓋凡將子孫付與屬下人員撫養者並非欲得

其產業也撫養之人能自孩提時兢兢業業侍奉撫養卽其功也
及至長成又得產業籍其人口不但於理不合卽爲所撫養之人
亦於心不安五旗多有此事此風斷不可長凡事但以理斷之始
合大體前下嫁阿祿科爾沁巴特麻之縣君曾奏獻伊三佐領朕
諭云朕乃天下大君在彼在此俱爲朕之臣庶若取至京師反滅
損其旗分故不准行蒙古王等聞之無不感激流涕土默特有七
佐領該台吉無後者至今朕恩養閒居彼處前曾奏請編在察哈
爾旗下朕未允行後又奏請陪送公主朕亦未允此皆朕至公無
私之意今薩爾布善將宗室塞冷額撫養成人反將其產業占據
人口入在包衣佐領下爲奴可乎此處並未明白陳奏原本著發
還○丙午命張文燦以升銜畱原任以呂猶龍爲浙江按察使

鹽道

八月癸丑 上行圍發熱河○戊寅諭禮部朝鮮國王李焞奏前往伊國境內海洋捕魚船隻請再行嚴禁見今內地海洋小寇雖飭地方官嚴行查拏但海面遼闊時或有之邇來浙省海洋賊寇潛行劫奪官兵追捕遊擊一員被傷身亡曩者附近朝鮮海洋潛行捕魚船隻曾經申飭盛京將軍及沿海地方官員嚴加巡察緝拏而今尚有八九船隻違禁潛出外洋竟至朝鮮邊界捕魚是卽賊寇也嗣後如有此等捕魚船隻潛出朝鮮海面者許本國卽行勦緝如有生擒作速解送毋因內地之人致有遲疑

九月庚寅 上駐蹕納木生札色賜來朝外藩鞍馬金幣及隨圍蒙古官兵銀布○癸巳 上還熱河○庚子湖廣總督鄂海奏鎮筸邊外紅苗除前招撫三千餘名外臣復差土百戶紅苗頭目深入大山再宣 皇上威德將盤塘窩等八十三寨生苗盡行招撫

共計男婦大小二千一百八十餘名苗目龍天保等前赴武昌投誠得旨紅苗等居深山之中自古以來並未向化鄂海等宣示朝廷德澤盡行招撫殊屬可嘉今紅苗等已去邪輸誠削髮投順地方文武官員務仰體朕無分內外俾盡享昇平無不樂業之至意將紅苗等安插得所從容化導教之禮義儻有不肖官員將紅苗視爲度外侵蝕擾害者該督撫卽行指名奏參○壬寅 上奉

皇太后自熱河回鑾○丙午以沈涵爲內閣學士

由少詹事遷

○庚戌

上奉

皇太后還京師○諭諸皇子等皇太子允礽自復位以

來狂疾未除大失人心

祖宗宏業斷不可付託此人朕已奏聞

皇太后著將允礽拘執看守朕明日再頒諭旨示諸王大臣

冬十月辛亥朔

御筆硃書諭諸王貝勒貝子大臣等前因允礽

行事乖戾曾經禁錮繼而朕躬抱疾念父子之恩從寬免宥朕在

眾前曾言其似能悛改伊在 皇太后眾妃諸王大臣前亦曾堅
持盟誓想伊自應痛改前非晝夜警惕乃自釋放之日乖戾之心
卽行顯露數年以來狂易之疾仍然未除是非莫辨大失人心朕
久隱忍不卽發露者因向有望其悛改之言耳今觀其行事卽每
日教訓斷非能改者朕今年已六旬知後日有幾況天下乃 太
祖 太宗 世祖所勦之業傳至朕躬非朕所勦立恃 先聖垂
貽景福守成五十餘載朝乾夕惕耗盡心血竭蹶從事尙不能詳
盡如此狂易成疾不得眾心之人豈可付託乎故將允禔仍行廢
黜禁錮爲此特諭又傳諭曰朕今雖六旬賴 祖父之福自幼嘗
以英傑自許朕於允禔非不能制但今之人善者少而惡者多允
禔秉性兇殘與惡劣小人結黨允禔因朕爲父雖無異心但小人
輩懼日後被誅儻於朕躬有不測之事則關繫朕一世聲名彼有

一小太監善福如廁皆遣人伺察以此觀之當無處不留心伺察者矣昨質問彼隨侍二太監當面唾辱伊毫無愧色其不堪可知況前者釋放時曾有諭旨善則爲皇太子否則復行禁錮載在檔冊今毫無可望故有此諭諸王大臣奏曰皇太子乃皇上之子皇上所知較臣等更切皇太子復立之後皇上日加訓誨望其自新今皇上洞鑒其未改重念太祖太宗世祖皇帝勅立鴻業不得已籌畫備至出自乾斷頒示諭旨臣等自應欽遵但皇上聖躬闕繫甚重祈寬釋頤養臣下庶可稍慰上曰著傳諭諸臣自釋放皇太子以來數年之閒隱忍實難朕乃能之卽今皇太子飲食服御陳設等物較之於朕殆有倍之伊所奏欲責之人朕無不責欲處之人朕無不處欲逐之人朕無不逐惟所奏欲誅之人朕不曾誅以朕性不嗜殺故耳凡事如所欲行以感悅

伊心冀其遷善也乃朕如此俯從而仍怙惡不悛是以灰心毫無
可望至於臣庶不安之處朕無不知今眾人有兩處總是一死之
言何則或有身受朕恩傾心向主不肯從彼甯甘日後誅戮者亦
有微賤小人但以目前爲計逢迎結黨被朕知覺朕卽誅之者此
豈非兩處俱死之勢乎此數年間侍朕左右之人因朕有勿得責
罰之命故伊不加荼毒至伊屬下內外人等種種捶楚不可勝計
今卽妻孥亦皆寒心俱以爲當廢解一墮淚者頃在熱河駐蹕時
朕之侍衛每日射箭歡笑飽餐頒賜食物顏色豐潤無不愉樂伊
處黃桂侍衛溽暑之時流汗執役肩擔損木手執鋤鋤手足胼胝
哭泣怨望無有不知者伊處止有一門出入之人甚雜亦眾所知
朕雖日遣大臣一員侍衛十員看守俱似無目者然今爾等奏請
朕躬關繫甚重宜加頤養但自釋放皇太子以來數年之間朕之

心思用盡容顏清減眾皆緘默曾無一人如此勸解者朕今處置已畢奏此勸解之言何用前次廢置朕實憤懣此次毫不介意談笑處之而已前廢皇太子之時朕所誅不過數人皆係皇太子惡劣所致今鎖拏之人雖多朕惟將一二愆慝皇太子爲惡者誅之其餘概不深究不忍令臣庶無辜受戮也嗣後眾等各當絕念傾心向主共享太平後若有奏請皇太子已經改過從善應當釋放者朕卽誅之果爾初拏皇太子之時何無一人保奏今已頒諭旨完結之後奏亦無益日後朕若再行復立其何以示天下耶○壬子吏部議覆陝西巡撫雍泰奏四川陝西總督殷泰以患病不能理事應准其解任調理得旨殷泰自爲兵丁時朕灼知其義勇歷加簡用升授總督以來不負委任潔清自持約束屬下恩威並用陝西軍民無不感戴朕深愛惜之今聞病勢已減著在任調攝○

癸丑諭戶部朕宵旰孜孜勤求民瘼永惟惠下實政無如除賦蠲租將天下地丁錢糧自康熙五十年爲始三年之內全免一週使率土黎庶普被恩膏除將直隸奉天浙江福建廣東廣西四川雲南貴州及山西河南陝西甘肅湖北湖南康熙五十年五十一年地丁錢糧一概蠲免歷年舊欠錢糧一併免徵外所有江蘇安徽山東江西四省除漕項外康熙五十二年應徵地畝銀共八百八十二萬九千六百四十四兩有奇人丁銀共一百三萬五千三百二十五兩有奇俱著察明全免其歷年舊欠銀二百四十八萬三千八百二十八兩有奇亦併著免徵計三年之內總免天下地畝人丁新徵舊欠共銀三千二百六萬四千六百九十七兩有奇各該督撫務須實心奉行體朕軫念民生至意如有侵欺隱匿使惠不及民借端科派者該督撫嚴行察參督撫失察事發之日亦嚴

加究治諭旨到日立即徧示城郭鄉村咸使知悉○乙卯吏部議覆戶部尙書穆和倫等審噶禮張伯行互參一案張伯行所參噶禮各款既經穆和倫等審明皆虛張伯行畏縮不能出洋反誣陷張元隆通盜不審不結拖斃多人不能嚴拏賊盜遲延命案又妄行參奏有玷大臣之職應如所奏革職至噶禮所參張伯行各款既經穆和倫等審明俱係從前舊案不於彼時參奏亦應議處但所參張伯行不能出洋等處俱實應如所奏免議得旨張伯行居官清正天下之人無不盡知允稱廉吏但才不如守果係無能噶禮雖才具有餘辦事敏練而性喜生事並未聞有清正之名伊等互參之案皆起於私隙聽信人言所致誠爲可恥朕臨莅天下五十餘年徧諳諸事於滿洲蒙古漢軍漢人毫無異視一以公正處之且噶禮屢次具參張伯行朕以張伯行操守爲天下第一斷不

可參手批不准諭旨見在噶禮處此所議是非顛倒著九卿詹事科道會同矢公據實再議具奏又諭大學士等閱朕此旨是則是非則非面奏時卽從直具奏朕不但不加責而且甚喜漢大臣不可又以皇上聖明承順覆旨朕聽政五十餘載凡滿漢大臣皆當知朕之居心滿漢皆係朕之臣子朕視同一體並不分別無知之輩且謂朕爲何不護庇噶禮朕乃天下之主凡事惟順理而行豈可止護庇滿洲明日回奏時朕另有諭旨○丙辰九卿詹事科道面奏噶禮張伯行互參一案上曰從古治天下者莫要於至公朕御極五十餘年凡內外大小之事皆以公心處之觀近日外官滿洲所參大抵多漢人漢人所參大抵多漢軍皆非從公起見朕悉據理處之並無偏向張伯行居官清廉人所共知其家亦殷實朕巡河工時彼適爲按察使知之甚悉但才具略短耳噶禮辦事

歷練至其操守朕不能信若無張伯行則江南地方必受其戡削一半矣語云文官不愛錢武官不惜命然後天下乂安又云清官不累民朕爲天下主自幼學問研究性理等書如此等清官朕不爲保全則讀書數十年何益而凡爲清官者亦何所倚恃以自安乎左都御史趙申喬奏曰上諭清官不累民極是張伯行居官果清上曰爾等俱係大臣既知張伯行清官當會議時何無一言今朕既有諭旨爾等方贊其清亦晚矣又諭曰如蕭永藻富爾安張鵬翮趙申喬施世綸殷秦張伯行此數人皆清官朕皆愛惜保全昔日趙申喬任偏沅巡撫時居官甚清但有氣性人皆畏其議論伊與俞益謨互相訐參彼時亦有以趙申喬爲非者朕細加察訪卽俞益謨所轄武官及同鄉陝西人良心不昧俱言俞益謨之非無有以趙申喬爲不是者清官固所當惜其言之不可行者

朕亦不行如趙申喬條奏黃河圯地免糧一事朕不准行雖所言未當而並無私見凡交與伊一應事件皆實心辦理朕是以護惜之至陳鵬年稍有聲譽學問亦優噶禮之欲害之也久矣張伯行聽信陳鵬年之言是以噶禮與之不和曾將陳鵬年虎邱詩二首奏稱內有悖謬語朕閱其詩並無干礙朕纂輯羣書甚多詩中所用典故朕皆知之卽末句鷗盟二字不過託意漁樵陳鵬年詩見在非無據者今與爾等公看可知朕心之公矣又諭曰噶禮張伯行互參一案初次遣官往審爲噶禮所制不能審出及再遣大臣往審與前無異爾等諸臣皆能體保全清官之意使爲正人者無所疑懼則人俱欣悅海宇長享昇平之福矣諭大學士等滿洲大臣毋謂朕偏向漢人朕至公無私之心天下共見斷不肯讓美於古人自幼所學者此以所學見諸行事者卽此也○丁巳諭大學

士等今年浙江等處海賊沿途劫奪客商船隻殺傷官兵直至盛
京殊屬可惡見今正當北風之時海賊俱焚燬船隻各回本省家
中應趁此時嚴加查拏著派兵部刑部賢能滿漢司官各一員差
往浙江福建廣東會同該督撫逐戶嚴行搜拏務期必獲方好這
逐戶搜緝民雖略受辛苦盜賊一靖於民大有裨益○己未以李
發甲爲福建布政使蔡琦爲山東按察使由四川永甯道遷○壬戌吏部

等衙門遵旨再議噶禮張伯行俱係封疆大臣不思和衷協恭互
相訐參殊玷大臣之職應將噶禮張伯行俱革職但地方得清正
之員方不貽累百姓張伯行應否革職畱任伏候 聖裁得旨噶
禮著革職張伯行著革職畱任○癸亥 上御暢春園內西廠閱
試武舉騎射技勇畢諭武殿試讀卷官等曰今兵丁讀書考試誠
一美事武職雖以騎射嫻熟人材壯健爲要若不知讀書則不知

兵法今提鎮等官俱簡用學問優者該管兵丁令其教習故爲兵者亦皆鼓舞而讀書者多矣○諭大學士李光地曰爾曾以易數與眾講論乎算法與易數脗合朕凡閱諸書必考其實曾將算法與朱子全書較過今人看正書者少宋儒講論性理亦未嘗不作詩賦但所作詩賦皆醑厚朱子以蘇軾所作文字偏於粉飾細閱之果然若看聖賢講論性理諸書雖賦性魯鈍及至日就月將定有裨益○甲子賜李顯光等九十九人武進士及第出身有差○乙丑宗人府奏貝勒海善違旨令太監李煥在各處妄行又不將實情陳奏應將伊貝勒革退得旨海善著革退貝勒令伊兄滿都護襲替○丙寅以揆敘爲左都御史由工部左侍郎遷○以赫壽爲江南江西總督郎廷極爲漕運總督由江西巡撫遷○直隸巡撫趙宏燮奏眞定府屬井陘縣秋被旱災請發倉賑濟得旨直隸各省督撫每奏

報年穀收成朕必批令豫籌積貯以備小有災荒卽行賑濟諭旨甚明井陘係小縣村落無幾偶遇小災便聞人民不得安堵如果能遵前旨於豐年豫爲積貯何至艱食此皆因地方官奉行不實全無儲蓄所致自後須遵朕前旨實心奉行務期有濟民生○己巳命禁錮廢皇太子允禔於咸安宮○庚午禮部請議明年萬壽典禮得旨朕御極以來惟欲萬國乂安上則敬天法祖下則垂令名於後世孜孜然以至鬢髮盡白心血耗散歷盡憂勤蕩平險阻自古帝王在位不久享年不遐者論者往往歸於別故而未諒帝王實不勝其難實不堪其勞憂懼所迫以致享祚之不永也朕反復思維昔帝堯固辭華封之祝必似朕臨莅年久之君方能知聖人言之有實也餘則斷不能知矣朕本涼德惟賴祖考得國之正積福之深在位五十餘年壽屆六十今憂勞倍增血

氣漸憊惟恐愈久而力不支願不遂以至不全終始一世勤瘁俱

屬徒然朕惟兢兢惕厲並未畱心祈求甲子之週也覽禮部請旨

之奏悉屬虛文無有實際朕惟願臣清子孝兄友弟愛人人皆讀

正書勉盡職業國安民治盜賊甯息各以至誠實意爲朕六秩慶

祝朕卽嘉納此外儀文朕無所嗜亦無所好這所奏不准行○轉

張格爲工部左侍郎以馬進泰爲工部右侍郎由內閣學士遷○以佟國

勳爲江西巡撫由湖南布政使遷○癸酉贈故原任威略將軍福建水師

提督吳英太子少保子葬○甲戌以綽奇爲內閣學士由左副都御史遷

○丙子諭大學士等吏部引見八月分掣籤官員內有行止不端

出身不正者著九卿各據見聞陳奏將所奏之員卽令原品休致

此等人員不於此時查明俟到任後被上司參劾致員缺久懸於

地方甚屬無益嗣後月選官員掣籤後某人得某缺人品何如行

止何如之處著問九卿具摺啟奏○以阿琳爲湖南布政使

由原任貴州按察使遷

州按察使遷

○是月免山東魚臺江南山陽淮安等十八州縣衛水災

額賦有差

十一月甲申禁武職守備以上官於任所入籍置產○乙酉以明

安爲左副都御史

由郎中遷

○先是浙閩總督范時崇等列款糾參革

職福建提督藍理貪婪酷虐流毒士民應請拏究上命侍郎覺

和托等將藍理帶往福建會審至是覺和托察審藍理霸市抽稅

焚贓累萬被害不止一家流毒已極應擬斬立決得旨藍理應依

議處斬但在臺灣澎湖對敵之時奮勇向前著有勞績著從寬免

死調取來京入旗○辛卯諭大學士等前原任四川巡撫能泰曾

具摺奏請開礦後又奏稱江中有銀派官監視撈取以爲兵餉朕

以此二事俱不可行隨硃筆批發朕乃人君豈有令江中撈取銀

兩之事見此二事卽知能泰必貪爾等可傳能泰問之尋大學士等奏傳問能泰據云奏請二次 皇上皆硃筆批不准行算開礦所用工費價值亦無大益 上曰以此觀之一面奏請一面卽行矣督撫提鎮奏摺一二次朕卽可知其行事也○甲午戶部議覆左都御史趙申喬奏 皇上施恩天下將地丁銀兩俱皆蠲免請將陝西潼關衛山西大同府所屬徵收米豆草束一體蠲免應不准行得旨潼關衛大同府所屬康熙五十一年應徵米豆草束已經徵完今雖蠲免無益小民明年應徵米豆草束著蠲免○乙未以廢皇太子允禔遣官祭 天地 太廟 社稷告 天祭文曰嗣天子臣 貼黃 敢昭告於 皇天上帝曰臣纘承鴻業祗迓 天庥夙夜憂勤惟以社稷蒼生乂安爲務向以允禔狂惑成疾難以負荷丕基於康熙四十七年九月十八日特行廢黜嗣以臣體違

和因念父子之恩冀其悔悟自新遂從寬釋允祚亦自立誓痛改
前非因而復行冊立詎意數年以來狂疾益增暴戾僭越迷惑轉
甚臣念太祖太宗世祖締造艱難付託不易如允祚者罪
咎滋深斷難承祀爰行廢黜用加禁錮昊天上帝俯鑒臣衷謹
告其告祭地壇太廟社稷文同○丙申大學士等以秋審
情實罪犯五十人請旨上將刑部重囚招冊逐一詳閱反復審
定句者三十二人既畢諭大學士等曰明代決囚俱於西四牌樓
其時秋決之囚亦甚多崇禎時偶遣內侍往覘有鳴冤者否俄有
一人鳴冤卽歸奏聞乃遣太監袁本清傳諭將此人暫停處決時
禁城不許乘馬而袁本清習於安佚兩人扶掖逾時方至其人已
正典刑矣袁本清不得已將應決人犯盡釋崇禎怒杖袁本清臀
肉俱盡朕昔親見袁本清言之甚詳此皆不慎之於平時以致臨

期舛錯也故朕於招冊皆細加研勘此情實五十人卽盡誅之並無冤枉而猶必反復詳究於無可生之中求一綫可生之路無非矜愼民命之意也○戊戌先是鎮國公景熙首告託合齊父子於該王服內宴會並貪婪不法各款上命皇子大臣察審至是奏各款俱實應將託合齊卽行凌遲處死伊子舒奇擬絞監候秋審處決奏入畱中○己亥羣臣以萬壽六旬請上尊號得旨朕臨莅日久每於讀書鑒古之餘念君臨天下之道惟以實心爲本以寶政爲務若侈陳功德加上尊號以取虛名無益治道朕所不喜前諸王大臣等屢有奏請朕曾手書批示諭以斷不允行前旨甚明所奏知道了○庚子差往江南審事尙書張鵬翮奏原任江南布政使宜思恭叩闕案內原任江南江西總督阿山江蘇巡撫宋華索取節禮查審是實應交該部議處得旨阿山宋華俱係年老

大臣著從寬免○甲辰 上謁 陵啟鑾○諭大學士李光地曰

張鵬翮疏奏福建水師甚要朕思臺灣澎湖之地關繫甚大海壇

南澳二處不甚緊要李光地奏曰海壇實無緊要閩安是一要口

海壇總兵官移駐閩安方善 上曰頃總兵官李雄率領舟師追

趕海賊報稱至登州海面適遇風波幾至危殆今值冬季北風正

多李雄入洋以來朕甚以爲念又聞海中商船三日即可到盡山

花鳥伊等用船勝於北人遠甚若言乘馬不但漢人遠不及滿洲

卽漢軍亦不足論乘船則南人爲善皆由熟練之故耳江海中行

甚險朕意欲令投誠海賊指引路徑乃有益也○丁未以廢皇太

子允禔頒詔天下○己酉 上謁 暫安奉殿 孝陵至 仁孝

皇后 孝昭皇后 孝懿皇后陵奠酒○以張聖佐爲安徽布政

使

由江西按察使遷

○予故左都御史穆丹祭葬○是月免江南沛縣浙

江安吉等四州縣水災額賦有差

十二月癸丑以蔡升元爲內閣學士

原任

○庚申諭理藩院聞鄂爾

多斯地方連年大雪饑饉薦臻將人口賣與四十九旗並喀爾喀者甚多可速差官查問送還本籍務使各遂生業以副朕體恤外藩至意○辛酉戶部議覆正白旗滿洲副都統吳爾德黑奏請增造通州中南大西倉廩座應不准行 上諭大學士等增添廩座乃一善事蓋廩座增設之後則入新收貯換陳放出廩座一空又將新者收入不但米不至耗費而出入之數亦清每年放給米石皆有一定之數如此一清則各倉之弊可絕矣爾等會同九卿詹事科道詳議具奏尋會議中南大西二倉共添設倉廩一百座從之○甲子諭大學士等朕辦事有年凡人命審擬事件要期悉當平理今陳汝咸條陳應照宋時洗冤錄較定致命傷痕處所畫一

除槍刀弓箭銅鐵等器械外木棍等俱不作兇器夫人命事件有
拳毆腳踢木棍毆打致死者若酌兇器輕重定罪之輕重則事必
致舛錯如鍼乃最微之物將鍼刺人致死豈可因鍼非殺人兇器
而免其罪乎孟子云可使制梃以撻秦楚之堅甲利兵由此觀之
木棍亦兇器也○丙寅 上駐蹕熱河○先是 上命御史陳汝
咸出洋招撫海賊陳尙義等至是奏陳尙義等投順○賜來朝外
藩銀幣鞍馬及隨圍蒙古官兵銀布○戊辰以劉槃爲江西按察
使由直隸天○甲戌 上還京師○是月免直隸井陘縣旱災額

津道遷

賦有差○是歲朝鮮來貢○人丁戶口二千四百六十二萬三千
五百二十四田地山蕩畦地六百九十三萬四百四十四頃五十
五畝有奇徵銀一千九百五十萬八千三百五十三兩五錢有奇
米豆麥六百九十一萬三千六百七十五石有奇草四百八十五

萬八千六百七十二束茶二十三萬八千三百二十八引行鹽五百九萬三千六百八引徵課銀三百七十二萬九千八百九十八兩有奇鑄錢三萬七千四百九十三萬六千八百有奇

東華錄

康熙九十一

臣王先謙敬編

臣周瀚蕃恭校

康熙五十二年癸巳春正月癸卯諭大學士等鄉會試皆掄才大典關繫緊要今見考試官不遴取真才止圖賄賂夤緣作弊者漸多此等人若不加嚴處卽行正法斷乎不可正考官係考場統領之員副考官同考官等通同作弊嚴加覺察是其專責而謂不知情何也趙晉吳肇中二案處分正考官等互異應行嚴議著問九卿具奏又諭近閱部院衙門堂司官員俱各守分惟刑部侍郎張志棟前任三省巡撫時居官何如己必自知屢經革職降級之後補小衙門堂官及授刑部以來辦事好勝把持衙門凡九卿會同揀選保舉時惟伊保薦者甚多猶以爲未足又在別人保薦處列

名自大吏降補小衙門理宜自愧乃復覲顏貪戀官職專以保舉

爲事殊屬無恥著革職○甲辰以盧詢爲雲南布政使

由江蘇按察使遷

牟欽元爲江蘇布政使

由湖北按察使遷

○九卿議覆江南科場賄通關

節之副考官編修趙晉原擬斬監候但趙晉係副考官擅通關節

大千法紀應照順治丁酉科場例改斬立決呈薦吳泌試卷之同

考官句容縣知縣王曰俞原擬流三千里查王曰俞通同作弊亦

應改斬立決黃緣中式之吳泌及說事通賄之俞繼祖等照原擬

絞監候呈薦程光奎試卷之同考官山陽縣知縣方名原擬絞監

候查方名平素與程光奎往來見過程光奎之文程光奎在場內

鈔錄舊文方名明知其文卽行呈薦榜後又向程光奎索謝應改

斬立決其場前在貢院內埋藏文字入場鈔寫中式之程光奎照

原擬絞監候倩人代筆中式之徐宗軾及夾帶文字中式之席珩

並照原擬枷責正考官副都御史左必蕃係專任科場之官失於
覺察應革職從之又議福建科場賄通關節之同考官吳肇中應
擬斬立決黃緣中式之王湯三說事通賄之林英應擬絞監候正
考官檢討介孝琰副考官工部主事劉儼失於覺察應革職從之
○戊申諭理藩院班禪胡土克圖爲人安靜熟諳經典勤修貢職
初終不倦甚屬可嘉著照封達賴喇嘛之例給以印冊封爲班禪
額爾德尼○以王企靖爲刑部右侍郎

由左副都御史遷

舒蘭爲內閣學

士原任

二月庚戌諭領侍衛內大臣大學士九卿等趙申喬奏皇太子爲
國本應行冊立朕自幼讀書凡事留意纖悉無遺况建儲大事朕
豈忘懷但關繫甚重有未可輕立者昔立允礽爲皇太子時索額
圖懷私倡議凡皇太子服御諸物俱用黃色所定一切儀注幾與

朕相似驕縱之漸實由於此索額圖誠本朝第一罪人也宋仁宗三十年未立太子我太祖皇帝並未豫立皇太子太宗皇帝亦未豫立皇太子漢唐以來太子幼冲尙保無事若太子年長其左右羣小結黨營私鮮有能無事者人非聖人誰能無過安得有克盡子道如武王者今眾皇子學問見識不後於人但年俱長成已經分封其所屬人員未有不各庇護其主者即使立之能保將來無事乎且爲君難爲臣不易古來人君窮兵黷武者有之崇尚佛老者有之任用名法者有之朕御極五十餘年朝乾夕惕上念祖宗遺緒之重下念臣民仰望之殷乾綱獨斷柔遠能邇體恤臣庶毫無私心當吳三桂叛亂時已失入省勢幾危矣朕灼知滿漢蒙古之心各加任用勵精圖治轉危爲安是以數十年來海寓甯靖今欲立皇太子必能以朕心爲心者方可立之豈可輕舉卽

臣僚爲國爲民念茲在茲先憂後樂者實不易得太子之爲國本朕豈不知立非其人關係匪輕朕將允祔從幼教訓迨後長成變爲暴虐無所不爲不知忠孝不識廉恥行事乖戾有不可言者推其故皆由瘋狂成疾迷惑所致此疾有二十餘載矣凡人醉後傷人醒時知悔伊似長醉不醒所爲過惡身不自知伊之儀表及學問才技俱有可觀今一至於此非瘋狂而何自廢而復立以來朕尤加教訓心血耗盡因伊狂疾終不痊愈故又行廢黜孟子云父子之閒不責善責善則離離則不祥莫大焉大學云人莫知其子之惡蓋父之於子嚴不可寬亦不可誠爲難事如朕方能處置得宜耳爾諸大臣俱各有子凡人幼時猶可教訓及其長成一誘於黨類便各有所爲不復能拘制矣立皇太子事未可輕定特召集爾眾大臣明示朕意趙申喬所奏摺著發還○辛亥福建巡撫覺

羅滿保請於九仙山建立萬壽碑亭上不允○宗人府等衙

門奏託合齊肆行悖逆罪惡重大今雖於監禁之處病故應將伊
剝屍揚灰不許收葬伊子舒起仗父威勢恣意橫行應擬絞監候
從之○甲寅諭大學士等朕昨問投誠海賊陳尙義伊等出洋行
劫遇西洋船隻懼其火器不敢偏近惟遇東洋商船則掠取其銀
米亦不盡取以此商船仍往不絕也中國與西洋地方俱在赤道
北四十度內海洋行船中國人多論更次西洋人多論度數自彼
國南行入十度至大狼山始復北行入廣東界常六閱月在海中
不見一山又自西洋至中國有陸路可通因隔鄂羅斯諸國行人
不便故皆從水路而行鄂羅斯距京師約萬二千里西洋及土兒
虎特地方皆與鄂羅斯接界鄂羅斯倚土兒虎特馬匹土兒虎特
用鄂羅斯皮張往年鄂羅斯與雪西洋戰士兒虎特助鄂羅斯大

敗雪西洋又回子溫都斯坦布海兒夜兒根等處產棉製甲四十層可敵浙江棉八十層曾以鳥槍試驗知之又過哈密六百里有吐魯番地方去雪山百餘里其人晝伏至夜始出耕種其地甚熱而多石若日出時耕種輒熱死又哈薩克卽古陽關地其人性好鬪常結隊以殺擄爲事人心亦齊若婦女被人擄去其擄去之婦女必乘閒手刃其人而回此地亦熱草極肥盛馬皆汗血所產蘋果葡萄梨等物皆大而美又西北回子種類極多皆元太祖後裔又有一支在小西洋約十萬人皆住帳房惟北極下爲最寒往時曾有人築室而居明年人往視之其人已無復存者但見林間雪深數丈而已昔人云北海有積冰數百丈向以爲荒誕以此觀之信不誣也總之西北地方極大其風土亦各不同朕曾詳悉訪問是以周知也○以甘國璧爲江蘇按察使

由山東登萊道遷

張連登爲湖

北按察使

由直隸通永道遷

○乙卯

上巡幸畿甸啟鑒○以崔徵璧爲

左副都御史

由通政使遷

○大學士等以刑部等衙門審擬戴名世私

造南山集照大逆例凌遲一案請旨 上諭戴名世從寬免凌遲

著卽處斬方登嶧方雲旅方世禎俱從寬免死並伊妻子充發黑

龍江此案內干連人犯俱從寬免治罪著入旗○予故內閣學士

凌紹雯祭○癸酉諭大學士等福建巡撫覺羅滿保奏閩縣等十

六州縣員缺請於卓異人員內揀選補授部議不准督撫等爲得

人地方起見懇切陳奏理所宜然其應否准行補授恩出自朕近

見督撫此等事奏請言官每從中阻撓邇來一御史奏稱閩屬十

六州縣員缺滿保請揀選卓異薦舉官員補授可爲一時之計未

可爲經久之例不如擇本省之員調補若揀選卓異薦舉官員補

授必致懸缺以待於地方無益等語閱之似乎有理其實皆係卓

異薦舉官員逆料伊等應該升轉不願往海濱苦地希圖美缺因於未經部覆之先豫行條奏則部議自然不准所以特屬言官言之也如此則權盡歸都察院科道等官此是明末惡習斷不可長爾等到京問九卿詹事科道具奏朕回鑾時務將閩屬十六州縣員缺卽行補授發往○刑部等衙門會議順天府鄉試中式第一名查爲仁之父查日昌倩人爲伊子代筆賄買書辦傳遞文章事發後又脫逃被獲應斬監候查爲仁中式情弊雖由伊父主使而通同作弊又相隨脫逃希圖漏網其書役龔大業收受賄賂傳遞文章俱應絞監候代查爲仁作文之舉人邵坡應革去舉人杖徒失察之監察御史常泰李宏文應罰俸一年從之○甲戌刑部等衙門會議順天鄉試中式之周啟係原任步軍統領託合齊家人周三之子倩人代筆串通賸錄受卷所吏役通同作弊應絞監候

周三於賄屬司獄周芝荃致死首告伊子之邵文卿希圖滅口案內已經論斬從重歸結至於說事通賄之談汝龍高岳受贓之賸錄所書吏何亮公受卷所書吏錢燦如亦應絞監候代周啟作文之王廷銓應杖徒失察受卷所官唐縣知縣李嶠瑞降一級罰俸一年監試御史楊篤生陳勳阿爾賽石芳柱各罰俸一年賸錄所官無極縣知縣陳明倫已經休致提調官順天府府丞李法祖已經別案革職俱無庸議得旨周三周啟身係奴僕肆行賄賂紊亂科場大典情罪可惡俱著處斬李嶠瑞楊篤生阿邇賽石芳柱陳勳等係專司科場事務官員怠玩疏忽不行嚴禁殊屬溺職著革職餘依議○乙亥 上還京師○子故吏部尙書桑額祭葬

三月戊寅朔諭諸王貝勒貝子公大學士九卿等朕昨進京見各處爲朕六十壽誕慶賀保安祈福者不計其數朕實涼德自覺愧

汗從來帝王之治天下罔不以民生爲念若爲一己之私卽不能擴而充之矣朕若先知必令止之今已成矣難違眾志夜來思之達旦朕爲天下萬國之主萬國安卽朕之安天下福卽朕之福若能祈禱雨暘時若家給人足則朕安寢飽食可以卻病延年此朕之求福非有妄想也傳知各處凡有祝延萬壽者必以雨暘時若萬邦咸甯爲先朕已老矣有若無實若虛夙夜匪懈履薄臨深之念與日俱增敢有滿假乎○諭大學士等內閣學士宗紳保爲人糊塗著解退發伊該管王處行走○己卯兵部議准戶部尙書張鵬翮奏閩省沿海地方請將深知水性謀勇兼全之人委用凡各緊要之處添設兵丁營船及船中所用器械火藥豫備訓練及春秋二季令該總兵官親身巡查有海賊逃匿者卽行文廣東江南浙江等處協力擒剿 上諭大學士等張鵬翮所奏海上事宜率

皆空言無補不可施行賊船停泊必依據海島有淡水之處每日在山頂瞭望見官兵船來卽遁去外洋官兵退後乃復卻回有謂商船宜改爲平底止用一桅者不知商船重載入水數尺方能壓浪每造一船費至一二千金若勒令改造則不肖官員因此擾害商人將何以堪商船雖帶軍器火藥一遇賊船商人並不敢與敵船中所有隨其所取盛京泛海兩三日卽可抵盡山花鳥利之所在人所必趨泛海往來旣速又省路費商船豈有不往之理朕昨問投誠海賊陳尙義康熙三十八年閒伊等賊船尙多因與廣東提標官兵拒敵大敗而遁止存船四隻此後從未登岸沿海官兵防守甚嚴卽海外諸小國亦不聽伊等停泊賊船缺少火藥無處購買俱託漁船往盛京旅順等處代買朕昨閱地圖山東水師住處未爲扼要然設立已久不便議裁宜於盛京上游要地添設營

船二十隻此駐防之船即將各省水師營船及駕船水手酌量調取出洋巡哨並帶陳尙義等前往海中盜賊伊悉知之自然漸次擒獲矣張鵬翮並未熟悉情形其所條奏卽令伊身任其事亦未有裨益也此本著發還○乙酉諭大學士等朕聞各省爲祝萬壽來京者甚眾其中老人更多皆非本地人時居春閒寒熱不均或有水土不服亦未可知爾等卽傳諭漢官等儻有一二有恙者卽令太醫院看治務得實惠以示朕愛養耆老之至意○戊子諭南書房翰林等聞各省祝萬壽老人俱於十七日在西直門外本省龍棚下齊集接駕十八日在正陽門內聽禮部指地方行禮行禮後若再至龍棚恐城門擁擠年老之人實有未便況十七日朕進宮時經過各省龍棚諸老人已得從容瞻仰十八日行禮後老人不必再至龍棚下接駕爾等傳諭各省漢官徧諭各省老人知悉

○己丑諭大學士等今歲直隸各省年老官員來京祝萬壽者甚多此內除本省犯罪官員外或有因公呈誤降級革職者俱酌量復還原品於十八日隨班行禮○甲午 上奉 皇太后自暢春園還宮直隸各省官員士庶夾道羅拜歡迎 御輦耆老等跪獻萬年壽觴 上停輦慰勞徧賜老人壽桃及食品諸王貝勒貝子公宗室覺羅人等及文武大臣官員兵丁並於誦經處跪迎 上霽容俯視皆賜以食品○諭大學士等今歲天下老人爲朕六旬大慶皆從數千里匍匐而來如何令其空歸欲賜伊等筵宴然後遣回著查八旗滿洲蒙古漢軍漢人大學士以下民人以上年逾六十五歲者奏聞在本月二十三兩日內擇定一日賜宴豫爲奏聞便於備辦內有艱於動履不能前來者聽其能來者俱令之來卽不能來者朕另行按分頒給詔內有恩賜老人一款凡恩賜

有名者於名下註明今時漸炎熱賜宴後卽令回籍耕種其家奴勿入所查數內再查八旗滿洲蒙古漢軍以至包衣佐領下不論官員閒散人等年七十以上老婦亦著奏聞俟老人賜宴後再定一日送至 皇太后宮賜宴有艱於動履不能前來者聽之其能來者俱令之來若有貧乏不能來者著各屬協助車馬使之前來俱開真實年歲不可捏報再敕宗人府諸王以下宗室子孫內二十歲以下十歲以上選擇聰明堪供任使者六七十人令於耆老前執爵卽朕子孫皆令之出宗室外不用他人也○乙未 萬壽節 上朝 甯壽宮御 太和殿受賀詔曰朕五十餘年上畏天命下懷民暑以敬以誠覃思上理且以一心對越 上帝未嘗瞬息稍懈賴 昊穹之孚祐 祖宗之蔭庇國家蓄積有餘民間年歲豐稔朕以涼德勉思 列聖體大順公操心慮患敷景運於休

明洪基業於光顯夙夜冰兢宵旰靡遑屈指春秋年居六旬矣覽
自秦漢以下稱帝者一百九十有三享祚綿長無如朕之久者朕
之虛薄良深歉仄何敢稍有倦怠以負孜孜圖治之初心況在位
之久始勤終怠往往不能垂令名於後所以乾惕之懷彌殷憂勞
之志愈切兼之承平歲久幅員日廣戶口漸增風俗日薄朕與臣
鄰夙夜在茲以剛健中正惇大成裕謙尊有終持盈保泰猶恐未
能豈自滿假少有逸豫朕以天下爲心天下當亦體朕之衷各矢
蓋誠皆敦孝敬型仁講讓守己奉公務勤職業官僚胥勸人士奮
興使遐邇之均被小大之咸周以享昇平之福此非朕之德乃
天地祖宗之賜今朕式慰中外臣民之情博考典禮大沛膏澤
用稱躋世於仁壽之至意中外臣民俱加覃賜養高年舉遺逸旌
孝義蠲逋負鰥寡孤獨無告者官爲養之罪非常赦所不原者咸

赦除焉○庚子諭大學士九卿等朕聞廣東米價騰貴每石賣至一兩八九錢至二兩不等將軍管源忠亦因米貴具摺奏聞朕軫念天下民生無閒遠邇雖邊徼之外視之猶輦轂之旁也粵地素號產米之區從無價高至一兩以上及二兩者茲米價驟增小民必致艱食督撫係封疆大吏凡有關地方事務隨所見聞卽應據實陳奏今萬里情形朕已周悉而伊等漫無奏報殊屬懈怠前福建歲荒米貴朕特旨截漕數十萬由海道轉運賑濟諭旨方頒市價立平於地方大有裨益今廣東亦宜照截漕海運朕因詳詢投誠海賊陳尙義等目今截留江南漕糧可否由海轉運廣東據稱截江南漕糧由海轉運八九日可至福建自福建八九日可抵廣東但此事關繫重大非微賤所敢身任見今風勢不順斷不可轉運必至八九月後北風漸利始可轉運等語朕意於八九月後將

水師營戰船裝載米石運送易於到廣而兵丁亦並可熟練水務其天下地丁錢糧前已於三年內全免一周今粵地米價翔涌若將本年地丁錢糧仍行催徵則民力維艱難免輸將之苦應將本年地丁錢糧停其催徵遣趙申喬等前往廣東會同督撫將朕軫念民生至意刊示宣布以慰輿情再恩詔內有賞賚綠旗兵丁一款卽令趙申喬乘便動支彼處庫帑親行覈實按名逐一散給俾各需實惠爾等會同確議具奏又諭國家幅員甚大水旱豐歉勢有不齊凡遇歉收之年督撫等但據實速報則或蠲賑或停徵先期酌行於百姓乃有裨益至所奏地方官員捐俸賑濟皆虛名而已何益之有州縣爲親民之官科目出身之人亦多有迂疏不能辦事者惟張鵬副任浙江巡撫時閩省錢糧七年全完馬齊任山西巡撫時亦全完七年錢糧其餘各省報數年錢糧全完者未之

有也○壬寅宴直隸各省漢大臣官員士庶人等年九十以上者三十三人八十以上者五百三十八人七十以上者一千八百二十三人六十五以上者一千八百四十六人於暢春園正門前傳諭眾老人曰今日之宴朕遣子孫宗室執爵授飲分頒食品爾等與宴時勿得起立以示朕優待老人至意又諭曰書稱文王善養老孟子云七十者非帛不暖非肉不飽帝王之治天下發政施仁未嘗不以養老尊賢爲首務近來士大夫止論居官之賢否而移風易俗之實政入孝出弟之本心未暇講究朕因今日之盛典特宣此意若孝弟之念少輕而求移風易俗是其所厚者薄而其所薄者厚矣爾等皆是老者比回鄉井之間各曉諭鄰里須先孝弟儻天下皆知孝弟爲重此誠移風易俗之本禮樂道德之根非淺鮮也昨日甘霖大沛田野霑足朕心大悅爾等無誤農時速回本

地特諭是日 上升座命扶掖八十歲以上老人至 御前親視
飲酒各賜老人白金有差○諭大學士等年老諸大臣內於 世
祖章皇帝時居官者惟宋犖田種玉而已今年齒老邁雖閒居林
下朕睹之不禁軫恤宋犖見有尙書品級在身田種玉著給與工
部尙書銜俱准給誥封宋犖田種玉著酌加宮保以示朕不忘耆
舊之至意尋議宋犖加太子少師田種玉加太子少傅從之○甲
辰宴八旗滿洲蒙古漢軍大臣官員護軍兵丁閒散人等年九十
以上者七人八十以上者一百九十二人七十以上者一千三百
九十四人六十五以上者一千十二人於暢春園正門前諸皇子
出視頒賜食品宗室子孫執爵授飲 上升座命扶掖八十歲以
上老人至 御前親視飲酒各賜白金有差○乙巳八旗滿洲蒙
古漢軍七十歲以上婦人齊集暢春園 皇太后宮門前隨召九

十歲以上者入宮門內八十歲以上者至丹墀下七十歲以上者集宮門外大臣妻年老者亦皆召至宮門內賜坐 皇太后 皇上親視頒賜茶果酒食等物其餘令諸皇子率宗室子以次頒給又賜大臣妻衣飾綵段素珠銀兩

夏四月戊申朔諭諸王貝勒大臣等朕今日傳集爾等因憶及數事朕若不言無敢言之人非朕亦無言此事者藍旗兩貝勒及碩託貝勒皆緣事問罪撤帶革去宗室 世祖皇帝時恩卹藍旗貝勒之子薩哈連碩託之子岳塞布俱給以阿思哈尼哈番之俸伊等皆係 太祖皇帝之孫至朕僅歷四世凡宗室革退者不載玉牒 太祖皇帝有十五子緣事革退者亦未經載入似此革退者若不載入玉牒久後竟無人知矣宗室有罪僇之處之自有定法非欲復翻舊案也今若不查明而差別之則日久年遠漸致湮沒

所關甚大應將此等查明俱續載於玉牒內酌量給帶以示差別再覺羅等其始亦由祖分支有緣罪撤帶革退者若不查明示以差別亦必致湮沒再宗室覺羅之棄子今雖記藍檔內以宗人府定例甚嚴懼而不報亦未可定原任內大臣覺羅他達爲上駟院大臣時因子眾多將棄其妾所生之子包衣佐領鄭特聞之乞與收養他達遂與之朕知其事會下旨於內務府總管儘遇來選之時切不可將伊女混入後鄭特欲將此子遣回此子以撫養之故云甯不得帶子必不忍離撫養之父母朕念其孝給以紅帶仍留伊養母處有似此等者亦應查明再我朝從征效力大臣中莫過於鰲拜巴圖魯者伊功勞冊大內見有念伊效力之處欲襲其官但其子那摩佛所生達里善達福俱譴劣行止不端句引蘇完之人在阿哥處行走不絕朕知之至今未授官職鰲拜功勞顯著應

給世職惟達里善兄弟斷不可襲應於伊兄弟中另擇承襲之人再五大臣內蘇完扎爾虎齊公彭春之祖鄂善之祖伊等見有世職鑲藍旗順科落巴圖魯安費揚古之功勞已經裁去今阿靈阿之祖額亦都巴圖魯之功勞載於實錄甚明見在太廟配享此等有功之人身後子孫緣罪干連既去其官誥命敕書亦並無存此等皆係太祖太宗皇帝時輔佐開勦功勳大臣因其子孫自作之罪將伊等勞苦功績所得之官革去實爲不忍朕知之甚悉五大臣及十六員扎爾虎齊內緣罪革職者應查明給與官職又襲職子孫緣罪革去者亦應查明酌議具奏○己酉賜八旗滿洲蒙古漢軍年老婦人白金有差○甲寅大學士等以左都御史趙申喬奏農忙之時京城地方亦應遵例停訟奏請旨上曰農忙停訟之言聽之似乎有理而細究之實無裨益趙申喬總未

知事之本源耳天下之民非獨農人商賈涉訟卽廢生理百工涉訟卽廢手藝地方官不濫准詞狀於應准者准之卽行結案則不失農時訟亦少矣若但四月至七月停訟而平日濫收民詞案牘堆積冬季詞訟遲至次年五六月而後審理雖停訟何益康熙元年閒去明代不遠明之官員太監尙有存者朕聞其君常處深宮不與臣下相見而惟與宦豎相處旣不讀書亦不勤政所以上下之情壅蔽不通民間疾苦竟罔聞知朕理天下五十餘年周知民隱一切訟事皆有代告說合之人暗司其事地方官於此等人應嚴加懲治孔子云聽訟吾猶人也必也使無訟乎無訟之本並不在停訟爲大臣者當先憂後樂凡事周詳籌畫實心辦理乃能利益民生趙申喬爲農忙之時應行停訟儻四月至七月數月之間或有光棍詐害良善則冤向誰訴耶且自八月以後正當收穫並

非閒時果如伊言亦不應准詞狀至於南方四月收麥福建廣東十一月種麥二月收穫五月種稻十月收穫四季皆農時也如此等處豈終歲停訟乎趙申喬居官固清但性多疑所屬州縣每疑其貪詐書云用人勿疑朱子曰疑人卽是自疑今朕所用大臣朕曷嘗疑之凡督撫有才者未必有守有守者未必有才然自恃清廉每事紛更民卽受其害矣讀書之人務先明理當以克己爲要有過則改無容掩飾惟有益於民之事朕卽允行否則斷乎不行也○諭朕生性不嗜殺人然於差官恤刑之事不欲舉行惟恐奸宄之徒乘此傲倖免罪耳聞趙申喬爲巡撫時好准詞訟張鵬翮爲巡撫時不肯准詞訟兩人之性各有偏向如此今以場中閱文一事論之主試之人衡文取士必當除去偏見選拔佳文若以偏見閱文則人心不服上科京闈鄉試雖無交通賄賂之弊而所中

之卷不佳且有少年稚子傲倖入彀卽題目應出各種乃得佳文
今歲京闈鄉試所出七題皆係理致士子偶有一二語合主司意
者遂獲登錄其同考官選文薦閱又皆揣摩主司之意場中士子
未能各展其長而實學之人多被擯不錄者職是故也○諭吏部
川陝總督殷秦前會因病奏請解任調理朕念殷秦清潔自持約
束屬下恩威並用陝省軍民罔不感戴朕甚愛惜令在任調攝已
有諭旨今病勢未能卽愈總督印務雖有巡撫署理但陝西地方
遼闊最屬緊要總督員缺不可久懸殷秦著解任湖廣總督鄂海
屢任陝西熟諳地方兵民情性俱所深悉且才具頗優將鄂海調
補川陝總督○癸亥以鄂倫特爲湖廣總督由湖廣提督遷○丁卯上
問戶部尙書張鵬翮曰明末時張獻忠兵到四川殺戮甚慘四川
人曾有記其事之書籍否張鵬翮奏曰彼時四川人屠戮殆盡無

有記其事者

上曰李自成與張獻忠在河南鄧州分兵張獻忠

遂至四川其閒詳細未能悉知爾父今年八十有七以張獻忠入川時計約已十七八歲必有確然見聞之處爾問明繕摺進呈又諭大學士等曰明末去今爲時尙不甚遠傳聞李自成兵到京師之人卽以城獻又聞李自成麾下之將李定國在西便門援城而上由此觀之仍是攻取可云獻乎此等載入史書甚有關係必得其實方善張獻忠有養子三人耳鼻皆被割去朕曾見之又明代行兵多用太監管領以致敗亡爾等纂修明史其萬厯天啟崇禎年間之事應詳加參考不可忽畧○遣官祭長白山醫無閭山五嶽四瀆厯代帝王陵寢孔子闕里○賚天下綠旗兵○戊辰四川提督岳昇龍遺奏請將伊家口改入四川民籍得旨武職官員不許在任所入籍置產會有諭旨今岳昇龍奏稱伊母年逾九旬不

東華錄

康熙九十一年

古

能遠涉著照所請准其家口入籍四川○乙亥和碩顯親王衍潢等請於宗人府衙門內建上功德碑不允○丙子追賜故陝西涼州總兵官師帝賓諡曰恪僖

五月戊寅刑部尙書胡承恩乞假遷葬允之○己卯大學士等奏從前奉旨收貯審擬喇嘛巴漢格隆等呪厭廢皇太子允祔一案查案內除喇嘛巴漢格隆馬星噶卜楚護衛色楞雅圖及擬斬之拜雅爾圖俱請照原議正法又擬發遣之太監楊得志等亦請照原議發遣得旨明佳噶卜楚從寬免死著發遣白都納楊得志從寬免發遣著交與內務府總管○庚辰諭大學士等提督康泰奏稱蜀省一碗水地方聚集萬餘人開礦隨逐隨聚見在差官力行驅逐等語朕念此等偷閒礦廠之徒皆係無室可居無田可耕乏產貧民每日所得錙銖以爲養生之計若將此等乏產貧民盡行

禁止則伊等何以爲生果如滇省礦廠所出頗多亦可資助兵餉
此處所出無多該地方文武官員作何設法使窮民獲有微利養
贍生命但不得聚眾生事妄行不法似屬可行爾等與九卿會同
速議具奏○辛巳大學士九卿等遵旨議覆開礦一事除雲南督
撫雇本地人開礦及商人王綱明等於湖廣山西地方各雇本地
人開礦不議外他省所有之礦向未經開採者仍嚴行禁止其本
地窮民見在開採者姑免禁止地方官查明姓名記冊聽其自開
若別省之人往開及本處殷實之民有霸占者卽行重處 上曰
有礦地方初開時卽行禁止乃可若久經開採貧民勉辦貲本爭
趨覓利藉爲衣食之計而忽然禁止則已聚之民毫無所得恐生
事端總之天地間自然之利當與民共之不當以無用棄之要在
地方官處置得宜不致生事耳○甲申命外官推升題補及請留

任者俱引見○乙酉命留京教習進士以內閣中書缺補用○盛

京刑部侍郎慕成額以老乞休允之○丙戌 上奉 皇太后避

暑塞外啟鑒○轉張廷樞爲刑部尙書以王頊齡爲工部尙書

吏部右侍郎

○以田從典爲兵部右侍郎

由左副都御史遷

○予故吏部尙書

吳一蜚祭葬○辛卯以湯右會爲吏部右侍郎

由掌院學士遷

○壬辰

上奉 皇太后駐蹕熱河○戊戌遣官分賚喀爾喀等蒙古老人

○辛丑停今年秋決○禮部奏黃巖守備管遊擊事閻福玉與海

賊交戰陣亡業已蒙恩賜卹贈參將職銜又廕子弟一人以守備

用其給與祭葬相應停止 上曰閻福玉係登州人朕曾召見人

材壯健戰時爲賊所傷血流滿面謂眾曰此卽報主之處也奮勇

前入手刃十餘人力戰而亡此係與伊交戰賊人所說宜優加恩

卹以示鼓勵著給與祭葬○以郝維諤爲左副都御史

由通政使遷

○

乙巳調阿爾筏爲左副都御史以常泰爲內閣學士

由內閣侍讀學士遷

閏五月癸丑吏部議覆內閣中書奉旨用進士出身之人嗣後滿中書缺出應論旗分於進士內挨次擬用如無進士將舉人挨次擬用漢中書缺出用留京教習進士其從前進士舉人候選中書者俾其選授改歸知縣教職等項用其候選中書不由進士舉人出身者對品改選以鑾儀衛經歷詹事府主簿等缺用從之○裁通政使司漢左參議一詹事府漢諭德一漢中允一漢贊善一漢錄事一鴻臚寺漢寺丞一四譯館序班三國子監滿助教四漢博士一漢學正二行人司行人四太醫院御醫二吏目六豫授吏目四禮部司牲官二○乙卯兵部奏就撫海賊陳尙義等應作何安插請旨定奪上諭大學士等先經拏獲海賊俱已發遣甯古塔等處見經陳尙義等一百餘人又來歸誠內有熟識水性之人將

伊等歸併盛京金州地方著設立水師營近據山東總兵李雄奏請裁伊標下水師營戰船十隻即將所裁數內截留數船分往金州看守地方巡防海洋似有裨益著滿漢九卿詹事科道會同確議具奏又諭古大臣進言於君皆云墾荒積穀節用愛民明代萬厯年閒於養心殿後窖銀二百萬兩我朝大兵至京流寇挈金而逃因追兵甚迫棄之黃河大抵明代帑金流寇之難三分已失其一又於達賴喇嘛處費用無算凡製造器皿等物亦繁費不貲朕自御極以來酌量撙節不敢濫費從古無如朕之節用者大學士等奏曰不但如此節用爲從古未有 皇上愛民蠲免天下錢糧亦古所未有 上曰若不蠲免錢糧則民間匱乏將何所賴耶又諭曰人之喜怒不可有偏卽今內大臣侍衛等有厯事者亦有未厯事者未厯事之人一聞殺人之事必勃然大怒設令閱刑部奏

章豈勝其忿耶又讀書人於觀書時見有不合其意者輒生憤怒古書所載皆屬往事其善惡特爲後人法戒閱之但當自加儆省耳○賜熱河老人白金○辛未諭大學士等總督額倫特殷泰皆朕特用之人初用時人不知其善迨後乃稱皇上知人之明咸以爲異殷泰居官雖甚優然未免過於嚴厲人有怨之者巡撫張伯行家計饒足居官甚清日用之物一切取給於其家但於所屬官員輒心疑之自古疑人勿用人勿疑方且欲推心置腹以示人陰刻何爲若於所愛者故爲怒容待之於所惡者故以喜色遇之是欺人卽自欺也朕之喜怒無不卽令人知者惟以誠實爲尙耳天下凡事難以豫防惟歷事多見理明乃隨事之來措之合理朕於朱子全書序文內曾論及之又諭部院衙門辦事皆有成例憑例而行雖稍有未當其失猶輕若無例則無可憑矣如數十事一

例者自應畫一各任意見辦事可乎爾等辦事允宜遵守成例而行

六月丁丑諭和碩誠親王允祉律呂算法諸書應行修輯今將朕所製律呂算法之書發下爾率領庶吉士何國宗等於行宮內立館修輯○辛卯戶部奏廣東米價騰貴總督趙宏燦巡撫滿丕隱匿不報應交吏部議處 上諭大學士等趙宏燦滿丕居官不善於地方之事不思效力務爲隱匿是實聞奉差大人至廣東時民人懼忤焚香迎接奉差係國家大臣督撫獨非大臣乎觀此可知民情所向矣廣東米價先增至三兩一石今止需一兩六錢矣朕留意民瘼悉心採訪諸凡地方之事此處不報他處必有奏報者卽如盛京之事盛京不報但問烏喇往來之人卽知之矣朕前巡幸江南時豫聞江南有賊後果有一念和尙叛案總之事貴豫防

朕聽政年久一聞地方荒歉等事皆先爲籌畫措辦以消患於未萌乃督撫等不留心豫防及至地方有事謂皇上自能辦理豈可謂之大臣乎此事俟趙申喬到時再議○禮部奏兵部侍郎宋駿業詹事府詹事史夔故應照例賜卹上諭大學士等漢人中史夔宋大業宋駿業張志棟皆甚無恥張志棟好保舉人不顧顏面與山東人結黨宋駿業以能畫在內廷行走乃一險人專事結黨學問不及朕知而遠之姑念其內廷效力給與半葬史夔爲浙江考官聲名甚劣因在河工效力故復起用其祭葬俱著停止○大學士等以原任河道總督王新命之子王纘緒因曹遠芳等誣伊父爲開戶之人情急叩闕一案請旨上曰王新命乃四川生員被曹姓人擄爲養子事非虛誣但王新命會爲大臣待曹姓甚厚前王新命富貴時並未言及今其子孫貧困索取不遂加以訐辱

未免太刻入旗如此等人甚多此案事已年久且係國家大吏爾等與九卿會議似此等者當行禁止又諭曰連日之雨朕深恐致澇大學士等奏曰皇上殷憂爲民昨下旨祈晴今卽晴明洵屬奇異上曰朕記太祖皇帝時壬辰年澇世祖皇帝癸巳年大澇京城內房屋傾頽明成化時癸巳年澇城內水滿民皆避居於長安門前後水至長安門復移居端門若今霪雨不止雖無妨居人而田禾豈有不損耶今日天氣晴霽朕心藉以稍慰○乙未諭大學士等朕歷觀前史凡事皆壞於隱匿明代盜賊情形俱隱匿不報迨賊已及門尙然不知也豈知旱澇之災民生疾苦乃自古所有之事奏聞何傷若果督撫凡事皆據實奏聞豫爲防備雖有事亦復何害且朕臨御年久凡事有應商酌之處朕必與大臣等商酌而行惟軍機河工事朕卽批示恐與不知之人商酌反致

有誤也又諭曰甘肅巡撫樂拜奏陝西省免康熙五十一年錢糧甘肅衛所應徵之米未邀恩免請一併免徵朕令樂拜度兵餉之米足與不足再行奏請及彼詳計之果不足兵餉一如朕言彼但爲己之聲名計於兵餉緊要之處乃並不計及也○甲辰諭大學士等偏沅巡撫潘宗洛行事糊塗其所屬地方雨水田禾情形至今尙未奏報爲人行止何如著問九卿又諭人聞譽言如服補藥無益身心朕在位五十餘年聞人譽詞溢於耳矣實見其無益也又諭邵康節所言陽奇陰偶之數陽數少而陰數多是以凡物皆好者少惡者多亦從善難從惡易至於滿洲漢人之性迥然不同漢人以喜怒不形於色爲尙不知存心行事貴在誠實開誠示人自服之若懷詐挾術誰肯心服耶嘗見大奸大僞之人喜怒不形於色如吳三桂噶爾丹類皆如此此等人終必敗壞耳